


隸釋




漢書門			
二	四	七	八
一	二	九	八
八	五	九	八
冊	架	函	號

內閣文庫			
三	四	七	八
九	一	七	八
九	一	七	八
架	冊	號	類

內閣文庫			
番號	漢	2478	
冊數	18 (3)		
函號	297	114	

三





隸釋卷第三

淺草文庫

老子銘

楚相孫叔敖碑 并陰

仙人唐公房碑 并陰

張公神碑

三公山碑

無極山碑

白石神君碑

老子銘

老子姓李字伯陽楚相縣人也春秋之後周分為二
稱東西君簪六卿專証與齊楚竝僭號為王以大并
小相縣虛荒今屬苦故城猶在在賴鄉之東過水處

其陽其土地鬱壘高敞宜生有德君子焉老子為周
守臧室史當幽王時三川實震以夏殷之季陰陽之
事鑿喻時王孔子以周靈王廿五年生到景王十年年
十有七學禮於老聃計其年紀聃時以二百餘歲聃
然老旄之貌也孔子卒後百廿九年或謂周大史儋
為老子莫知其所終其二篇之書稱天地所以能長
且久者以不自生也厥初生民遺體相續其死生之
義可知也或有浴神不死是謂玄牝之言由是世之
好道者觸類而長之以老子離合於混沌之氣與三

光為終始觀天化識

缺

降什

斗

星隨日

九變與時消

息規槩三光四靈在廟存想丹田大一紫房道成身

化蟬蛻渡世自羲農以來

缺

為聖者佗師班固以老

子絕聖棄知禮為亂首與仲尼道違述漢書古今人

表檢以法度抑而下之老子

缺

與楚子西同耕林不

及孫卿孟軻二者之論殊矣所謂道不同不相為謀

也延熹八年八月甲子

皇上尚息弘道舍闕光大存神養性意在凌雲是以
潛心黃軒同符高宗夢見老子尊而祀之于時陳相

邊韶典國之禮材薄思淺不能測度至人辯是與非
案據書藉以為老子生於周之末世玄虛守靜樂無
名守不息危高官安下位遺孔子以仁言辟世而隱
居變易姓名唯恐見知夫日以幽明為節月以虧盈
自成損益盛衰之原倚伏禍福之門人道惡盈而好
謙蓋老子勞不定國功不加民所以見隆崇于今為
時人所享祀乃昔日逃祿處微損之又損之之餘眚
也顯虛无之清冢云先天地而生乃守真養壽獲五
福之所致也敢演而銘之其辭曰

於惟缺息抱虛守清樂居下位祿執弗營為繩能直
屈之可縈三川之對舒憤散逞陰不填陽孰能滯并
見機而位需郊出坳肥遁之吉辟世隱聲見迫遺言
道息之經譏時澈喻尋顯推冥守一不失為天下正
處厚不薄居實舍榮稽式為重金玉是輕絕嗜去欲
還歸於嬰皓然歷載莫知其情頗違法言先民之程
要以无為大缺用成進退无恒錯綜其貞以知為愚
冲而不盈大人之度非凡所訂九等之敘何足繫名
同光日月合之缺星出入丹廬上下黃庭背棄流俗

舍景匿形苞元神化呼吸至精世不能原印其永生
天人秩祭以昭厥靈羨彼延期勒石是旌

右老子銘篆額在亳州苦縣苦屬陳國故其文陳
相邊韶所作碑云延熹八年八月帝夢老子尊而
祀之帝紀此年春冬兩遣中常侍至苦祠老子水
經載蒙城王子喬碑亦云延熹八年八月帝遣使
致祠國相王璋乃銘紀遺烈蓋威宗方脩神仙之
事故一時郡國競作碑表此石立於延熹无疑杜
子美云苦縣和尚骨立者誤也碑中多用大史

公語唯眇然老旌之說不同韶以老子與子西同
科深詆班孟堅之失至於韓非同傳則又置而不
論何也碑云孔子學禮於老子時年十有七按世
家孔子年十七孟釐子病誠其嗣必師孔子故孟
懿子與南宮敬叔往學焉其次又云敬叔與孔子
適周見老子詳史之所記初非一年中事况孟釐
子卒在魯昭公二十四年孔子蓋年三十有五矣
韶不詳究史家之指而誤用之何貴乎五經笥也

碑以浴神為谷神旌与耄同渡与度
同林与纜同纒与累同冢与寂同

楚相孫叔敖碑

舊碑缺五十餘字此用續刻者故其文全

楚相孫君諱饒字叔敖本是縣人也六國時期思屬
 楚楚鄱南郢南郢即南郡江陵縣也君受純靈之精
 懷絕世之才有大賢次聖之質少見叔首蛇對其母
 泣吾將死母問其故曰吾聞見叔首蛇者死今日見
 之母曰若奈之何吾煞行數十步念獨吾死可空復
 令他人見之死為曰埋掩其刑母曰若無憂焉其陰
 德玄善遂為父母九族所異及其為相布政以道考
 文象之度敬授民時照藏於山殞物於藪宣導川谷

波障源淥溉灌坂澤堤防湖浦以為池沼鍾天地之
 美收九罟之利以愍潤國家家富人喜優嗜樂業拭
 序在朝野無蟻侮豐年蕃庶人有曾閔貞孝之行四
 民美好從容中節高相改幣一朝而化其憂國忘私
 乘馬三車不別牝牡繼高陽重藜五舉子文之統其
 忠信廉勇禮樂文章軌儀同制其富國充民明天時
 盡地力寔堅禹稷不能踰也專國權寵而不榮華一
 旦可得百金至於歿齒而無分銖之蓄破玉玦不以
 寶財遺子孫終始若矢去不善如絕罔辟患害於無

刑術節高義敦良奇介自曹臧孤竹吳札子罕之倫
 不能驟也生於季末仕於靈王立溷濁而澄清處幽
 晦而照明其遺武餘與懼不與戲皇帝代同世世為
 列姪國在朝廷其意常墨墨若冠章甫而望塗炭也
 病甚臨卒將無棺郭令其子曰優孟曾許千金貸吾
 孟楚之樂長與相君相善雖言千金實不負也卒後
 數年庄王置酒以為樂優孟乃言孫君相楚之功即
 忼慨商歌曲曰貪吏而可為而不可為廉吏而可為
 而不可為貪吏而不可為者當時有汙名而可為者

子孫以家成廉吏而可為者當時有清名而不可為
 者子孫困窮披褐而賣薪貪吏常苦富廉吏常苦貧
 獨不見楚相孫叔敖廉絜不受錢涕泣數行若缺首
 王王心感動覺悟問孟孟具列對即求其子而加封
 為子辭父有命如楚不忘亡臣社稷缺而欲有賞必
 於潘國下濕堯堯人所不貪遂封潘鄉潘即固始也
 三九無嗣國絕祀廢固始令段君夢見孫君則存其
 後就其故祠為架廟屋立石銘碑春秋烝嘗明神報
 祚即歲遷長掖大守及期思縣宰段君諱先字世賢

魏郡鄴人庶慕先賢體德允恭篤古尊舊奉履憲章
欽翼天道五典興通文藉祭祠祇肅神明臨縣一載
志在惠康殫枯粟之愛育藜蒸討掃醜類鰥寡是矜
杜偽養善是忠表仁感想孫君迺發嘉訓興祀立壇
勤勤愛敬念意自然刻石銘碑千載表績萬古標記
福祐期思縣興士熾孫氏蒙恩

漢延熹三年五月廿八日立

右楚相孫君之碑隸額今在光州延熹三年固始
令段光為叔敖作廟所立昔楚莊王朝而晏罷樊

姬因言虞止子之非虞止乃薦叔敖代已而去楚
國區區前有虞止後有孫叔其內又有樊姬莊王
雖欲不霸得乎左氏傳載為敖為艾獵杜預皆以
為叔敖它書但云孫叔敖此碑獨言其名饒未知
何據高相改幣乃孫叔革故易俗之事左傳所云
君子小人物有服章亦是類也蛇有二首謂之枳
首枳讀如枝亦曰岐首此云枝首蓋是借用鼃錯
倪寬史家亦用朝与兒字此以伍舉作五舉以庭
堅作霆堅豈古亦通用乎

碑中以刑為形以波為
陂以拭為式以儻為贊

以蔡為黎以駮為參以墨為默以郭為樽以孫叔長掖為張掖泉添水而為淥澤去水而為罽

以忠清相楚不以寶財遺子孫玉玦尚猶破之蓋

季文子公儀休之倫也云亾未幾妻子至於披褐

賣薪楚廷非无左右大臣塗其耳而不聞卷其舌

而不談慷慨悲歌感寤主聽乃一伶人爾豈樊姬

已死而叔敖薦進之士不逮虞丘乎三九無嗣者

无相繼為三公九卿也又廣聚嗜豎蟻處塗遷解即質聚游野螟處塗遷鰥

孫叔敖碑陰

延熹三年歲在字缺二中夏之節政在封表期恩長光

視事一紀訪問國中耆耆舊齒素聞孫君楚時良輔

本起比邦垂名於後博求遺苗曾玄孫子孝龜吉辰

五月辛卯宜以存廢可立碑祀招請諸孫都會國右

郭西道北處所顯好興上宰祭倡優鼓儻式序其胄

授之端首先以不肖貪追賢烈以自榮寵時丞左馮

翊姓如諱武尉京兆周陵詳集共造戶曹掾哀騰令

史許松

相君有三嗣長子即封食邑固始少子在江陵中子

居三缺虛缺業績林二宗則其苗胄也相君卒後

十有餘世有渤海大守字武伯武伯有二子長子字
伯尉少子字仲尉仕郡為掾史伯尉有一子字世伯
舉江夏孝廉城門候仲尉有二子長子字孝伯荊州
從事弟世信仕字缺二掾功曹會考哀之間宗黨為賊
叛所殺世伯孝伯世信各遺一子財八九歲微弱
不能仕學世伯子字子仲治產於續壺有六男一女
大子字長都次子蘭卿次第字仲陽次第字缺通次
弟字衛公次弟字劉卿此續宗六父也孝伯子字文
缺亦不仕學治產於材壺亦有六男一女大子字惠

明次第字次卿次第字聖公次弟字稚卿次第字產
卿次第字少都比材宗六父也世信一子相承季陵
文卿孝公比缺壺一父別其高祖與材高祖父親兄
弟孫氏宗族別缺謹紀也

右孫尉教碑陰此陰与前碑皆延熹三年五月所
作前云臨縣一載此云視事一紀盖以一紀為一
年爾段光宦君子之鄉懷良輔之美訪問耆舊博
求遺苗卜擇今日興廟植碑招集諸孫倡樂高會
又以其雲來長幼之序仕學生產之實刻于碑之

陰雖自譜其家者亦不如是之詳也續即繚字效即殺字誼即

譜字

仙人唐公房碑

君字公所成固人蓋帝堯之缺十之故能舉家缺五

去上陟皇耀統御陰陽騰清躡浮命壽無疆雖王公

之尊四海之富曾缺五毛天地之性斯其至貴者也

耆耋相傳以為至美居攝二季君為郡吏缺四土域

啖瓜旁有真人左右莫察而君獨進美瓜又從而敬

禮之真人者遂與缺期聲谷口山上乃與君神藥曰

服藥以後當移意萬里知鳥獸言語是時府在西成

去家七百餘里休謁往來轉景即全闔郡驚焉白之

府君從為御史昇轎輒車被具君乃畫地為獄召冒

誅之視其腹中果有被具府君缺賓燕欲逆學道公

所頃無所進府君怒勅尉部吏收公所妻子公所乃

先歸於谷口呼其師告以危急其師與之歸以藥飲

公所妻子曰可去矣妻子孿家不忍去又曰豈欲得

家俱去乎妻子曰固所願也於是乃以藥塗屋柱飲

牛馬六畜須臾有大風玄雲來迎公所妻子屋宅六

畜脩然與之俱去昔高松崔白皆一身得道而公所
舉家俱濟盛矣傳曰賢者所存澤流百世故使聳鄉
春夏毋蚊蝮秋冬鮮繁霜癘蠱不遐去其螟蠅百穀
收入天下莫知斯德祐之效也道牟羣仙德潤故鄉
知德者鮮歷世莫紀

漢中大守南陽郭君諱芝字公載脩北辰之政馳周
邵之風歆樂唐君神靈之美以為道重者名邵德厚
者廟尊乃發嘉教躬損奉錢倡率羣義繕廣斯廟
和祈福布之地民刻石昭音揚君靈譽其辭曰

上缺

遂享神樂超浮雲兮

下缺

碑陰

故江陽守長成固楊晏字平仲東部督郅成固左介
字元術故江陽守長南鄭楊銀字伯慎處本南鄭祝
龜字元靈司徒掾南鄭祝楊字孔達處本南鄭祝岱
字子華故益州從事南鄭祝忱字子文處本南鄭祝
恒字仲華處本南鄭祝朗字德靈處本南鄭祝崇字
季華大守史南鄭祝榮字文華大守史南鄭趙英字
彦才處本南鄭劉通字海缺故襄中守尉南鄭趙忠

字元楚

字缺二

南鄭楊鳳字孔鸞

右仙人唐君碑篆額漢中太守郭芝立今在興元唐君字公房王莽時人也博物志云城固縣壻鄉有唐公昉得道雞犬皆升仙惟以鼠有惡不得去鼠自悔每月一吐其腸胃更生謂之唐鼠摠仙錄所引博物志又云鼠至空中自墮腸出一月三易故山中有拖腸鼠水經云智水川有唐公房祠公房入雲臺山合丹服之白日升天雞鳴天上狗吠雲中以鼠惡留之鼠乃感激以月晦日吐腸胃更

生公房升仙之日壻行未還不獲同階雲路約以此川為居言无繁霜蛟虎之患其俗因号為壻鄉二說唯鼠事小異神仙錄則云神仙李八百為公房家傭偽作惡瘡使公房夫婦及三婢舐之又索美酒三十斛浣瘡因以餘酒浴公房夫婦顏色更少授以丹經一卷公房入雲臺山作藥藥成服之仙去其說俱異唯鍊丹雲臺与水經同爾後漢志云襄中有唐公防祠盖隸法房字其户在側故人多不曉或作防或作昉皆誤也

美即莽字聲即壻字胃即鼠字孿即

戀字

張公神碑

惟和平元丰正月

字缺二

朝歌長鄭栢造

缺

張公建

缺

良

缺

之山運置蔡陽刊齒涿摩立左右闕表神道

缺

豎碑廟堂之前到五月

字缺二

乃成長

字缺二

之銘勒神

懿光祕後昆其辭曰

於穆張公舍和泰清受符皇極乾剛川靈何天之休

元亨利貞無

字缺二

貴神耀洞

字缺二

度

缺

泉殿商北垆

鬱朝蔡陽厥土敞平芝草茂木瀟瀟滋榮羣萌勲矣

激川通

字缺三

懷

字缺八

廟克儉損盈詔命有司祭以中

牲歲聿再慶公其饗零興來億載歷數萬君

字缺七

太

字缺二

顯猶昭拂英勲

缺

錫介福惠此吏民國無灾寢

屢獲豐年

皇帝眉壽千祿于天牧守皆升握台輔辰長與丞尉

超遷相回休

缺

烈烈無

字缺三

臨犁陽營謁者李君

畏敬公靈好鄭長文澈奉佐工悃愍勤

缺

吏

字缺三

熹且惶作歌九章達李君頌公德芳其辭曰

蔡

水湯湯揚清波東疏

缺

折

缺

于河

字缺五

朝歌縣以絜

靜無穢瑕公缺守相駕蜚魚往來悠忽遂熹娛祐此

北民寧厥居出自纂字缺四松柏鬱茂蘭公字缺二神

往來乘浮雲種德收福惠斯民家饒戶富無缺貧豐

界宥靜和睦缺朝歌蕩陰及犁陽三女所處各殊

方三門鼎列推其鄉時攜甥姪歸候公夫人字缺三容

字缺五饗缺觴穆風屑兮起壇旁樂吏民兮永未央

鹿吻吻兮字缺二庭文樂樂兮字缺三飲清泉兮字缺三見

缺伏兮不駭驚惟公德兮之所寧上陵廟兮助三牲

天時和兮甘露冷日晡缺兮無虧傾字缺二蜚兮朱

鳥棲字缺二榮兮鳴啾啾戴鵠勦兮乳徘徊給御卵兮

戲于西惟公德兮之所懷池水缺兮釣臺祭四角

樓兮臨深澗魚岌岌兮踊躍見振鱗尾兮游盱盱時

釣取兮給亨鼈惟公德兮之所行栗蕭兮葉鋪

踈新美萌兮香苾芬蕙草生兮滿園田競苔茗兮給

萬錢惟公德兮之所缺門堂鬱兮文耀光公神赫

兮坐東方明暴視兮儼印印夫人缺女兮列在旁踈

君處北兮逆官缺車騎駱驛兮交錯重乘輓軺兮駕

蜚龍驂白鹿兮逆仙僮游北巒兮與天通玄碑既

立雙闕建号字缺四大路畔号亭長閣字缺二扞難号列

種槐梓方茂爛号天下遠近缺不見号公神日著聲

洞漏号字缺二乾川傳億萬号

臨犁陽營謁者豫章南昌李朝伯丞左馮翊夏陽趙

寵德雅朝歌長穎川陽城鄭栢伯林左尉京北下缺

水字缺二陽里郭冀子下缺扶風安陵字缺二昭公處士

魏君缺封缺仲舉處士魏君犁陽字缺四

右張公神碑隸額在黎陽威宗和平元年立碑云

朝歌長鄭栢為張公建闕作碑銘勒神懿監黎陽

營謁者李君好鄭之文既徹俸佐工又作歌九章

刻之石皴剝不明僅能辨其梗槩其辭依放離騷

頗亦適雅可觀詩中再稱其夫人又云朝歌蕩陰

及黎陽三女所處各殊方三門鼎列推其鄉時攜

甥幼婦候公不知張公是何神也漢志注云世祖

以幽并州兵騎定天下故於黎陽立營以謁者監

之碑以綦為淇涿摩為琢磨勒為巢僅為僮漏為徧盈即盈字慶即薦字宥即宋字从水之字皆

文篆

三公山碑

封龍君 靈山君

上缺分氣建立乾川乾為物父川為物母運生六子

二字缺為缺巨土為山字缺二風雨天有九部地有八極

天地通缺神明別序州有九山字缺成土北缺之凶

升缺阻上為祈首舍缺陰寶南彌三公厥體嵩厚

峻極于天鼎足帝缺二郡宗祀缺奉字缺三公嘉佑缺

為形地觸石缺雲不崇而雨陰缺氛廓莫不字缺二德

配五岳王公所緒四時珪璧月醮酒脯缺公降靈六缺

字得志列缺羣后或在王庭輔翼聖主颺雨時降和

其寒暑丰豐歲稔介我稷黍倉府既盈以穀士女二缺

字得進陳其鼎俎黃龍白虎伏在山所禽字缺二億

兩為耦草木暘茂臣佂不斲下民知禁順時而取皆

受德化非性能者顛明公垂恩罔極保我國君羣稔

百姓缺受元恩光和四丰歲在辛酉四月缺亥朔二

日甲子元氏左尉上郡白土樊瑋字子義瑋缺要二缺

字陵側陋出逆幽谷遷于喬木得在中州尸素食祿

缺以弱缺歸于缺族缺明缺謹缺以缺足觀聽字缺二

道無拾遺消杆缺難路無怨讟得應廉選貢名王室

靈祇福祉施出缺册於是感恩字缺二立銘勒石乃位

頌曰

儼儼明公民所瞻兮山缺窈窕石巖巖子高倉字缺二

候羣神兮興雲致雨除民患兮長吏肅菴字缺二心兮

四時奉祀柔稷缺兮缺用字缺五兮百姓家給國富殷

兮仁愛下下民附親兮遐邇攜負來若雲兮或有薪

采投輻檀兮或有缺鬼阻出缺兮或有字缺四耘子或

有隱遁辟語言兮或有恬淡養皓然兮或有呼吸求

長存兮改行喙息皆缺恩兮缺佑樊瑋出谷遷子封

侯食色傳子孫兮刻石紀德示後昆兮永永不缺億

載年兮

舉將南陽冠軍君姓馮諱巡字季祖缺脩六經之要

析字缺二出歷受命北征為民父母攘去寇缺用无

缺越竟民移俗改巷肅神祇敬而不怠皇靈缺

佑風雨時節農缺執耜或耘或芋童妾壺饁敬而賓

之稼穡穰穰穀至缺錢封粟如火咸裒仁心君姿前

詰喬札季文薦缺稂秀不為苛煩愍俗陵遲字缺二咨

缺山無隱士藪無逸民裒道以德慕此字缺二百姓歐

歌得我惠君功參周邵受祿考天長履景福子子孫

缺長史甘陵甘陵夏方字伯陽令京北新豐王翊字

元輔丞河字缺二武李缺字公興石陟劉元存

右三公之碑隸額兩旁又有封龍君靈山君六隸

字頗大郡國志常山國元氏注云有石塞三公塞

所謂三公塞即此山也石塞即白石山也白石碑

云縣界有六名山三公封龍靈山先得法食无極

山碑載光和詔書出元氏縣錢給三公山四時祠

具又云三公山与龍靈山无極山共興雲雨盖封

龍与靈山是兩山之名揭其神於額之旁者即是

配食三公之祠故碑中有鼎足之文也頌云儼儼

明公民所瞻兮碑云願明公垂恩罔極保我國君

盖以明公稱山之神而謂國相為國君也此碑光

和四年左尉樊子義立頌未有樊君徼福之句而

讚美舉將馮巡幾二百言馮君乃常山相也頌者

先公太師以使事為北方所留紹興癸亥年政地

王次翁使至燕先公鬲垣墻与驛中人語為覘

者所得賴副留守高吉祥之力脫縲紲而歸予之
出疆也高之子嗣先相廷勞以先世之故並轡殊
從容嘗諉其訪尋中原古刺云北人所不好市无
粥碑者及道過真定顧瞻名山三嘆而已碑以
為初犁
為黎叔為菽秀為莠遲為遲歐為謳鼎即鼎字柔
即黍字凶即凶字芋即籽字壘即壘字襄即懷字

無極山碑

光和四年缺月辛卯朔廿二日壬子大常臣旼承敏
頓首上

尚書謹案文書男子常山蓋高上黨范遷詣缺三
字為

元氏三公神缺一本初元年二月癸酉光和二二年二

月戊子詔書出其縣錢給四省祠具去年五月常山

相巡遣吏王勳三缺弘衰詣三公山請雨山神即使

高傳言令勳衰歸缺雨可得三公山即與龍靈山無

極山共興雲交雨國相巡元氏令王翊各白芊塞神

山復使高與遷及縣吏和卞令俱詣大常為無極山

神崇灑食比三公山臣疑高遷言不實輒移本國缺

覈今常山相書言部督郵書掾成熹參訊實問熹縣

令翊各言無極山與元隆俱生卍上至體可三里所

立石為體二丈五尺所政南缺上青下黃白色前
 政平可布兩大席山周币廿餘在西南世里縣界有
 名山其三公對龍靈山皆得法食每長吏祈福吏民
 禱告如言有驗乞合無極山比三公對龍靈山祠缺
 七牲出用王家錢小費蒙大福尊神呂珪璧為信臣
 愚臣為如巡言為民來福呂祠祀為本請少府給珪
 璧本市祠具如矣酉戊子詔書故事報臣耽愚顛頓
 首頓首上
 尚書

制曰可

大尚承書册事

上缺 月十七日丁丑尚書令忠奏雒陽宮

光和四年八月辛酉朔十七日丁丑尚書令忠下

光和四年八月辛酉朔十七日丁丑大常耽丞敏下

常山相缺 册事下承缺 用者如詔書書到言

昔在禮蕪國有名山能昇材用興雲出雨為民來福
 除典則祀元氏縣有先昔三公對龍靈山已得法食
 而獨未光和四年二月所子大男盖高上黨范遷奏

記大常大常下郡國相南陽馮府君咨之前志缺問
 耆僂僂呂為寔神且明每國縣水旱及民疾病禱祈
 輒應昔有報又有終南之敦物与岱崇之松及楊虺
 之棧缺條蕩焉村用於是乎出官民於是乎給左禮
 秩祀有功必報今昔無極山應灋食誠其宜且於是
 言大常奏可其丰八月丁丑詔書聽其九月更造神
 廟恢拓祠宮置更犧牲制月醮昔祠禮与三山同
 乃立碑銘德頌山之神焉其辞曰

巖巖無極厥體巍巍缺嵩缺萬常缺梯浚谷千刃

窈窕凸隈楸林蕊毒倉氣蔚伊缺石礪礙躑缺階漼

遙望儼然即就有威觸石膚寸興雲祁祁雨我公田

遂及我私百穀用成家有其資禱禳請祈應速不迟

鳥獸艸木蕃茂隆缺猥神為之哀欽案礼與咨古

遺則功加于民官報其德今備七牲珪璧法食改館

興廟恢拓宇室增益更設恭君下職月醮昔祀肅桓

齊壺缺必博碩酒必嘉榘染盛馨香如禮不共顛君

歆享降福孔缺官民禱祈僉缺密勿有呂禳解報應

可必缺灋食將祐我君我君高缺衆多子孫君其

遺慶副稱頌云

常山相南陽嗣軍馮巡字季祖長史潁川缺申屠缺

字缺二元氏令京北新豐王翊字元輔丞河内缺五

左尉上郡白土缺二字缺祠祀掾缺賢廉香缺掾

和缺五祠仁德掾樊淋史吳宜小吏吳黑

光和四年十月十三日缺二字缺石階缺二字缺造

右無極山碑篆額在真定此山与三公山封龍山

靈山白石山皆在元氏男子盖高范遷援三公龍

靈有請於太常乞官給珪璧四時祠具詔逆之吏

民更造廟宇而立此碑靈帝光和四年也蔡質漢

官典儀曰司隸城門校尉上尚書言頓首上下言

誠皇恐頓首上謂者上尚書頓首死罪上下言誠

皇恐頓首死罪上今所有者史晨樊毅兩碑皆用

謂者式与蔡說合惟此碑其后但再稱頓首又太

常稱臣而丞不稱莫詳其制碑云有終南之敦物

岱宗之松楊越之篠蕩盖以敦物為終南所產与

松篠同科今經史多作惇物注云山之名也顏之

推謂詩之有滄萋萋興雲祁祁當是興雨趙氏据

此碑云漢以前本皆作興雲因顏氏改之予按左
雄傳已作興雨祁祁則漢代言詩者自不同由唐
以來定本始以興雨為正非因顏氏也

碑以塞為
賽央為殃

條為篠刃為仞番茂為蕃茂灑即法字霰即霰字
元隆即天地字卍即從字慙即慙字拓即拓字栳
即栳字便即便字左
傳趙使傳使是也

白石神君碑

蓋聞經國序民莫急於禮禮有五經莫重於祭祭有
二義或祈或報報以章德祈以弭害古先哲王類帝
禋宗望于山川徧于羣神建立北域脩設壇屏所以

昭孝息民輯寧上下也白石神君居九山之數參三
條之壹兼將軍之號秉斧鉞之威體連封龍氣通北
嶽幽讚天地長育萬物觸石而出膚寸而合不終朝
日而澍雨沾洽前後國縣屢有祈請指日刺期應時
有驗猶自抱損不求禮秩縣界有六名山三公封龍
靈山先得法食去光和四年三公守民蓋高等始為
無極山詣大常求法食相縣以白石神君道德灼然
乃具載本末上尚書求依無極為比即見聽許於是
遂開拓舊地改立殿堂營宇既定禮秩有常縣出經

用備其犧牲奉其珪璧絜其粢盛旨酒欣欣燔炙芬
 芬敬恭明祀降福孔殷故天無伏陰地無魚鱉陽水無
 沉氣火無灾燂時無逆數物無害生用能光遠宣朗
 顯融昭明年穀歲熟百姓豐盈粟計五錢國界安寧
 介乃陟景山登崢嶸采玄石勒功名其辭曰

巖巖白石峻極大清皓皓素質因體為名惟山降神
 旣士挺生濟濟俊乂朝野充盈灾害不起五穀熟成
 乃依無極聖朝見聽遂興靈宮于山之陽營宇之制
 是度是量卜云其吉終然允臧匪奢匪儉率由舊章

華殿清閑肅雍顯相玄圖靈像穆穆皇皇四時禋祀
 不愆不忘擇其令辰進其馨香犧牲玉帛黍稷稻糧
 神降嘉祉萬壽無疆子子孫孫永永蕃昌



光和六年常山相南陽馮巡字季祖長史潁川申屠

熊缺三字元氏令京兆新豐王翊字元輔丞河南李邵

左尉上郡白土樊璋祠祀掾吳宜史解徹石師王明
 右白石神君碑篆額在真定靈帝光和六年立前
 二年蓋高等援三公封龍靈山請于朝為无極山
 得法食至是常山相馮巡元氏令王翊復具白石

本末求依無極為比朝廷聽許遂開拓殿宇琢石
勒碑其文有云居九山之數參三條之一趙氏莫
曉三條為何語按尚書正義曰從導岍至敷淺原
舊說以為三條地里志云禹貢北條之荆山則在
馮翊懷德縣南條之荆山則在南郡臨沮縣是舊
有三條之說也故馬融王肅皆以導岍為北條西
傾為中條蟠冢為南條自岷山之南至敷淺原別
以岷山為首不與大別相接則岷非三條也殷阮
碑云中條之山者蓋華嶽之體南通商雒以屬熊

耳其文與正義合漢人分隸固有不工者或拙或
怪皆有古意此碑雖布置整齊略無纖毫漢字氣
骨全與魏晉間碑相若雖有光和紀年或后人用
舊文再刻者爾
碑以番昌為蕃
昌拓即拓字



隸釋卷第三

寬政戊午

隸

卷第三

三

